

# UUT'T OLDE VODDEN

Allichte, zeg moar gerus beslis  
Hei vake wel us met emaakt  
Een vrouw dee 'nkakelkonte is,  
Dee over van alles kwaakt.  
Zó ene is nooit uut-eprotoat,  
Zee kent Jan en alleman,  
Is bliejd dat ze goed en kwoad  
An oew vetellen kan.

Doormet is tan nog neet ezeg  
Dat 'nkeerl altijd zal zwiégen,  
Wat 'n man wel us te barde breg  
Zoj soms ok wat van kriégen!  
Dat mansluú wat minder proat  
Is meschien dan wel woar,  
As ze al veur stil deурgoat  
Doors ok mennug kletsmajoor!

Moor der bunt ok vîle luû  
Dee zich der veur wilt leenen  
Zee wod ut proaten nooit muû,  
Dóór mot ze 't met vedeenen!  
Zo hef tr hier toé ene elopen  
Dee ging veurjoors óveral langs  
Um hofzoad te vekopen,  
In de moand meert zo mangs.

Hofzoad das gin rogge of haver  
Mangelzoad al net zo min,  
Hee had wel klaprзе, papaver  
Moar dat ging der neet hád in.  
'tGing wel um 'twat fiéne grei,  
Koolzoad, look, veral spinázie,  
Sla, sjelotten en ok wel prei,  
Was de venaamste klandizie.

Bloemezoad hadde ok zat,  
Bloème woln hier bes greujen,  
In buultjes lévrén hee dat;  
n Bloeme ston drop te bleujen.  
Had alles dus waj bie oe huus

In de hof door zaajen zollen,  
Of ok wel potten; das juus,  
Wnat soms waarn dat wel knoln.

Dee man dan, zeg ie kletsmajoor,  
Das nog zachte uut-edrukt,  
Watte zei, woar of neet woar  
tKlonk mooi, twas op-esmukt!  
Wat kon dee vent redeneern  
En zn spullen dan an-priézen,  
Hee had 't allerbeste alle keern,  
Roan oe ok waj mossen kiézen.

Zei datte vant zommer weer  
kwam  
Want hee wol dr veur instoan,  
En dan beslis teruge nam  
Wat neet was án- of op-egoan!  
Proaten, proaten as Brugman,  
Zo azze wiej dat hier zek,  
Toch bleeffe, door koj op an  
Wel netjes, had gin grote bek.

Dat trugge nemmen kan dat?  
As ie't zoad al ezaaid heb?  
Jò, al zeiè dat toor wel rad  
Dát te zeggen was ummers nep!  
Moar dat haj drek neet zo deur  
Iej heurn en zagn um as seef,  
tBetrouwbare brache noa veur  
Zodat 'tsafe wel hangen bleef.  
Al haj 'tum heel neet toé edach  
Um dát joor van um te kopen,  
Asse zn redenösie had ebrach  
Koj ut kopen neet ontlopen,  
Hee kreegd de mense altied mee,  
Van um ging'n soort krach uit,  
En alles watte zei of dee  
Was veur ons asn constitueut.

t Gebeurn 'n keer biej onze buurn

Dat zee nik s woln kopen,  
Drfden um neet vot te stuurn,  
En toé hee dr an kwam lopen  
Deen ze dörumme moor vlot  
De veurdeure op slot;  
Ze hadden nik s met um te maken  
Moor onze koopman, al kot biej,  
Had ut slot nog heurn kraken,  
tSlot was neet meer zo niej,  
En heurn ok duudluk nog  
nGröndel op de deure schoéven!

Och deur zon kleinugheid toch  
Leette zich neet af troéven;  
Hé ging d'hoek um en wieters,  
Hef wat verderop zaken edoan,  
En op d' trugweg, kvon 't mieters  
Isse der gewoon weer hen egoan;  
Ze hadden um noe neet ezeen  
Hee ston meténe al in de gange  
Zodat ze dus gewón moar deen  
Al zat ut eur wel wat krange.  
En ech, oft noe wel wézen moch  
Heffe juus extra goed vekoch!

Vlot proaten kan neet iederéne  
En zeker neet 't goed redeneern,  
Hoowel somgen door völ an  
deene  
Zoln zee dat toch nooit leern.  
Wee 't proaten mees zinloos deut  
Hoowelle ech vlot proaten kan,  
Altied in andermans zaken vreut,  
Of ut noe is 'n vrouw of 'n man,  
Zuk kletsen wille wiej toch neet  
Al steet ut van snaaksheid bol,  
Ast almoor over andren geet  
Dan is en blif ut moor gelol!  
Moar wiej bunt wel op de hand  
Van wie proaten zal met vestand!

OME JEHAN